

Marco Orioles al à cjapât in esam un campion di 315 citadins forescj di variis divignincis e religions che a son a stâ a Udin

Un studi al indaghe il rapuart tra imigrâts e religjon

Une tindince gjenerâl a un marcjade devozion de bande des variis comunitâts di imigrâts, cun cualchi diference tra lis diviersis religions calculadis (catolicesim, ortodossie, protestantesim intes sôs variis denominazions, islam).

Al è chest il dât principâl che al ven sù de ricereje puartade indevant di Marc Orioles, docent di dissiplinis sociologjichis al ateneu furlan, sul teme de partecipazion religjose dai imigrâts a Udin. Il studi, realizât cu la poie de Regjon, al è stât publicât intal saç intitulât "Nô o crodin. La fede dai imigrâts" (Edizions dal Ors, Alessandrie) e al è stât fat proponint un cuistionari a un campion di 315 citadins forescj di variis divignincis e confessions.

Il 98 par cent dai intervistâts al aderis a une religjon. «Un tas tant alt – al sclaris Orioles – che al conferme cemût che la religjon e fasi di element simbolic là che si cognossisi inte proprie vieste di imigrât intun pais forest, di membri di une comunitât etniche che e ven viodude ancjemò intal so ruardi cu la religjon praticade in patrie, al è un leâsi ae esperience intal propit pais di origin. In altris peraulis, la religjon e fâs ancjemò un rûl cul-

minatîf inte definizion dal se».

Dome che un cuint dai intervistâts (19,4 par cent) nol partecipe mai a cerimoniis religjosis.

I restants cuatri cuints (80 par cent) a declarin di lâ regolarmentri, dispès o al mancual cualchi volte intal lûc rispetif di cult.

La comunitât religjose plui partecip e je chê protestante, cul 98,1 par cent che al frecuente regolarmentri, dispès o cualchi volte il propit lûc di cult. A van daûr dai catolics, praticants inte misure dal 91,4 par cent, i ortodoss, cul 84,1 par cent, e infin i musulmans, che il lôr tas di partecipazion al va jù al 62,7 par cent.

La religjositât plui risaltade e je proprie dai plui anzians: ur vegnin daûr a no lungje distanze chei plui zovins, intant che al va jù di no pôc tra lis personis intes etâts centrâls de vite.

La maiorance assolude, 57,7 par cent, dai intervistâts di fede islamiche e riten che il vèl al vedi di jessi lassât ae libertât de femine, un dât plui alçât di chel di cui che al à rispundût che al è obligatori inveceit, 35,6 par cent. Un altri 6,7 par cent infin al declare che il vèl al è dome conseât, duncje no di no podê rinunziâi.

